

30. oktober 2009

UKA 2009/115

**Sanaartornermi neqerooruteqartarneq pillugu Inatsisartut inatsisissaattut
siunnersuut**

(Ineqarnermut, Attaveqarnermut Angallanermullu Naalakkersuisoq)

pillugu

Ineqarnermut Attaveqarnermullu Ataatsimiititaliap

ISUMALIUTISSIISSUTAA

Inatsisissatut siunnersuut aappassaaneerneqarnerani saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq, Olga P. Berthelsen, Inuit Ataqtigiit, siulittaasup tullia
Inatsisartunut ilaasortaq Anders Olsen, Inuit Ataqtigiit
Inatsisartunut ilaasortaq Kim Kielsen, Siumut,
Inatsisartunut ilaasortaq Ruth Heilmann, Siumut, sinniisussaq

Ulloq 6. oktober 2009-mi siullermeerinerup kingorna ataatsimiititaliap siunnersuut
erseqqinnerusumik naliliiffigaa, imalu oqaaseqaateqarniarluni:

Siunnersuummut tunuliaqutaasut

Sanaartornermut tunngasuni neqerooruteqartitsisarnermi siunissami tunngavissat
inatsisissatut siunnersuutikkut matumani pineqartukku aalajangersarneqartut,
taamaalillunilu sanaartornermut tunngasuni neqerooruteqartitsisarnermut maanna
inatsisaasoq, suliariumannittussarsiuussisarnermut inatsit 1992-imeersoq, Inatsisartut
inatsisaat nr. 3, 6. april 1992-imeersoq taarserneqartoq siunnersuuteqartup oqaatigaa.

Sanaartugassat suliariumannittussarsiuunneqarnissaat pillugu piumasagaammik suliariumannittussarsiuussisarnermut inatsit imaqaangitsoq aammalu inatsit tassatuaasoq periusissat pillugit inatsit, tassanilu suliariumannittussarsiuussinermi neqerooruteqartitsinissap atorneqarnissaanik toqqaasoqarsimatillugu suliariumannittussarsiuussinermi periuserineqartussanut maleruagassat aalajangersarneqartut siunnersuuteqartup oqaatigaa.

Inatsisissatut siunnersuut una pisortat sanaartugassaannut aammalu sanaartugassanut pisortanit tapiiffigineqartunut isumaqatigiissutinut atuuppoq. Siusinnerusumut sanilliullugu neqerooruteqartitsisut namminersortut siunnersuummi matumani maleruagassanik atuinissamut pisussaaffeqaangillat, taakkuninngali atuinissamut periarfissaqarlutik.

Sanaartortitsisut namminersortut isumaqatigiissuteqarfigisassaminnik toqqaanermi niuernermik nalinginnaasumik tunngaveqartarput, pisortalli aningaasalersugaannik sanaartortoqartillugu qitiutinneqartut taakkuuneq ajorput, tassa pisortat oqartussaasut inuiaqatigiinnut tunngasut assigiinngitsorpasuit isumagisassaralugillu mianerisassarimmatigit.

Pisortat sanaartugassaataannut neqerooruteqartitsissatillutik tunngaviit pingaarnert sanaartortitsisut siunissami malitassaat inatsisissatut siunnersuummi allassimapput. Neqerooruteqartitseriaatsit inatsisissatut siunnersuummi atorneqartut tamakkuninnga ingerlatseriaatsinik ilisimaneqareersunik aallaaveqarput.

Tusarniaanermi akissutit

Siunnersuutip ataatsimiititaliami suliarineqarnerani atugassatut tusarniaanermut akissutit nuutinneri ataatsimiititaliap piniarpai. Kiisalu tusarniaaneq pillugu allakkiamik ataatsimiititaliaq tigusaqarpoq.

Siunnersuummik suliarinnineq

Inatsisartuni siullermeerinermi siunnersuut ilalernerqarluartoq ataatsimiititaliamit maluginiarneqarlunilu paasineqarpoq siunnersuut matumani pineqartoq assut isumaqatigiissutaasoq.

Neqerooruteqartitsisarnermut tunngasumik suliassanik pisariusunik eqqartuussivimmuut assingusumik aalajangiisinnaasumik ilinniakatigit immikkut ilisimasalinnik inuttaqartussamik Neqerooruteqartitsinermi Maalaaruteqartarfimmik Naalakkersuisut pilersitsinissaanerit pillugu siunnersuummi aalajangersagaq assut iluarisimaarneqartoq ataatsimiititaliap aamma maluginiarpaa.

Taamatuttaaq sanaartugassat § 1, imm. 2-mi pineqartut sanaartorneqarneranni ilinniartoqassanersoq pillugu Naalakkersuisut maleruagassiorsinnaanerit siunnersuutikkut matumuuna periarfissinneqarpoq. Ataatsimiititaliap paasinninnera

malillugu siunnersuuteqartup taama piginnaatitsissuteqarnikkut anguniagaa pingaarneq tassaavoq kalaallinik sanasunik ilinniartitsinerup siuarsarneqarnissaa.

Aalajangersagaq taanna pillugu Unammilleqatigiinnermut Nakkutilliisoqarfiup tusarniaanermut ilanngussaa ataatsimiititaliamit maluginiarneqarpoq. Aalajangersagaq taanna nunat allat neqerooruteqartitsisarneq pillugu inatsisaannut sanilliulluni immikkut illuinnartoq Unammilleqatigiinnermut Nakkutilliisoqarfik isumaqarpoq. Unammilleqatigiinnermut Nakkutilliisoqarfik aamma isumaqarpoq isumaqatigiissutissat unammillissutigilluarneqarnissaat aalajangersakkap pinngitsoortissinnaagaa, taamatummi piumasaqaateqarnikkut neqerooruteqarusuttut ikilisinnaammata. Taamaattumik neqerooruteqartitsisarneq pillugu inatsimmi nalinginnaasumik piumasaqaataanera peerlugu ilinniartoqarnissamik piumasaqaat suliaassanut nassuiaatini ataasiakkaani ilanngunneqarnissaa Unammilleqatigiinnermut Nakkutilliisoqarfiup kaammattuutigaa.

Tassunga atatillugu illuliassanut sanaartugassanullu neqeroortitsisarneq pillugu Namminersornerullutik Oqartussat nalunaarutaanni nr. 15-imi, 5. juli 2007-imeersumi maleruagassat neqerooruteqartitsisarnermut inatsit naapertorlugu aalajangersarneqartut inatsillu taanna aqqutigalugu atorunnaarsinneqartut aqutsinikkut aalajangersagaq aqqutigalugu ingerlatiinnarneqarnissaannik Naalakkersuisut aalajangernerat ataatsimiititaliamit taparserneqarpoq.

Tamanna tunngavigalugu **ataatsimiititaliap isumaqatigiittup** siunnersuut Inatsisartunit akuersissutigineqassasoq inassutigaa.

Taama oqaaseqarluni Ineqarnermut Attaveqarnermullu Ataatsimiititaliap inatsisissatut siunnersuut Inatsisartunut aappasaaniigassanngortippaa.

Justus Hansen
Siulittaasoq

Demokraatit

Olga P. Berthelsen
Siulittaasup tullia

Inuit Ataqatigiit

Kim Kielsen

Anders Olsen

Inuit Ataqatigiit

Ruth Heilmann

Siumut

Siumut